

Commemorà il curaschi d'ina dunna

Sin l'areal en il vest da las Ovras da Domat è vegnida inaugurà venderdi la tavla da commemoraziun cun il num «Craps Gross». Ils «Craps Gross» regordan a las battaglia sanguinusa dals 3 da matg dal 1799 tranter ils Sursilvans ed ils purs da la regiun ed ils Franzos. La tavla da commemoraziun è vegnida instradada da la Vischnanca burgaisa da Domat en collavuraziun cun las Ovras da Domat.

MARTIN GABRIEL/FMR

Enramada da las producziuns d'ina delegaziun dals Tamburs da Domat cun uniformas istoricas han l'iniziant ed anteriur president da la vischnanca burgaisa, *Theo Haas*, il president actual dals burgais, *Ursin Fetz*, sco era il president communal *Erich Kohler* e la possessura da las Ovras da Domat, *Magdalena Martullo-Blocher*, undrà ils merits dals Grischuns cunter ils Franzos dals 1799. Quai – sco ch'igl è vegnì ditg – malgrà ch'ils Sursilvans e quels dal Plaun avevan pers 600 guerriers durant quel cumbat.

Omagi al curaschi da Onna Maria Bühler

Ils guerriers sursilvans e dal Plaun, armads cun guaffens da purs, eran sin buna via da stgatschar la schuldada franzosa avant Cuira. Ils indigens èn dentant – entras il sustegnimet nunspeità da chavallarists husars – vegnids rebattids fin a La Punt/Rehanau.



Ils protagonists flancads dals tamburs da Domat: (da san): Theo Haas, Magdalena Martullo-Blocher, Ursin Fetz, Erich Kohler e Daniel Kressig.

FOTO MARTIN GABRIEL

In document ch'è protocollà en l'archiv communal da Domat raquinta d'in schabetg en il vitg da Domat durant ch'ils Franzos stgatschavan enavos ils Sursilvans. La giuvna Onna Maria Bühler da

Domat saja currida ora sin via sper la Funtauna Sut ed haja fatg uschè gronda canera che la schuldada franzosa saja scappada. Onna Maria Bühler saja vegnida da tschiffar las mastrinas dals cha-

vals che tiravan in chanun dals Franzos. L'effect da la canera da la dunna è apparentamain stà uschè grond ch'ils Franzos han laschè enavos il chanun ed ils Sursilvans han pudì conquistar quel.

Il davos project sco president da la vischnanca burgaisa

Tant per il president actual Ursin Fetz sco era per Theo Haas che ha presidià la vischnanca burgaisa da Domat durant blers onns è l'inauguraziun da la tavla commemorativa «Craps Gross» stà in act impurtant per mussar a passantas e passants il lieu istoric cun ils craps or dal temp da la battaglia. L'interprendidra e cussegliera naziunala Magdalena Martullo-Blocher ha mess a disposiziun ina part da ses sulom per la tavla ed ils «Craps Gross». Theo Haas ha engrazià ad ella per quest gest e menziunà che l'inauguraziun odierna saja l'ultim project ch'el haja anc realisà sco parsura da la vischnanca burgaisa da Domat, avant ch'el haja surdà dacurt la batgetta ad Ursin Fetz.